

編號 1 號

【承水】林伯殷原作

落水咧！落水咧！看著大水點跔等風對佢掃過來，心肝肚正在該想，這陣水望還久哪！望到圳溝燥忒、河壩燥忒、水庫也燥忒咧！望到連田泥就必開來咧！佢正想愛膠手伸出屋簷下摸一下久見個雨水，告知無兩下，屋簷水就瀉往出，打在地泥下滴滴落¹，大嫲牯聲提醒佢，講這水毋會細哦，仰做得打夾忒！佢黏時去尋水桶放在屋簷下承水，想……等水張唸個時節，好倒落水庫貯起來，看做得毋使再過限水無？

看等、看等，水桶承個水緊來緊唸，佢心肝頭就越來越歡喜，感覺落大水還好哪！早恁久咧，滿哪都燥絲絲，有大水來解決欠水，還有麼个比這較好个？佢心肝變到盡貪，想……一陣大水仰會罇，係水無落較久兜、落較多兜，膠水庫撐到飽飽，若係太陽公三、兩下又弄等出來²，該就無結煞咧！又毋知愛望水望到幾時？好得屋簷水還係直瀉，水桶還係當當承，一桶、兩桶、三桶……，水桶承個水唸了又唸，佢斯像人看著水庫个水溢

¹ 滴滴落落：音 did` did` dab` dab`；形容雨滴滴打在地面或物體上所發出的聲音。

² 弄等出來：音 nung` nen` chud loi；鑽著出來。

出來³樣，實在還歡喜哪！

過一站，水變細咧，屋簷水變成一點一點慢慢跌到水桶肚，佢聽著涿、涿、涿个聲音，忽然間想起老屋个承水聲，該屋外落大水，屋肚落細水个時節，地泥下排等个盆頭鉢仔，分屋頂跌下來个水點打出滴滴涿涿⁴个聲音，還會隨等落大水變遽、落細水變慢，暗晡頭係睡在眠床頂，用聽就知外背个水落有幾大。係堵著風搓，水掃掃滾⁵，又聽著屋肚滴滴涿涿个承水聲，該就愛大愁屋頂毋知會承毋贏風雨，嘎塌下來無！平平係承水，仰在屋簷下膠屋肚會有恁大个爭差呢？好得這下人大體戴樓屋，毋使再過看著落大水就愁屋肚愛承水無！

天公還惜恁哪！連連續續又落好久个水，各地水庫个水位升加已多，照理講，大家較毋使驚無水好用咧，毋過，佢還係知有落水，就會尋桶放在屋簷下承水，想留加兜水來用，聽等該滴滴涿涿个聲音，佢心肝肚無半點愁慮，嘎有一種當滿足个感覺。

³ 溢出來：音 pun chud loi；滿出來。

⁴ 滴滴涿涿：音 did` did` dug` dug`；形容水滴滴在地面或物體上所發出的聲音。

⁵ 掃掃滾：音 so` so` gun`；用槍枝連續掃射的樣子。